

Exposicion di posternan pa conscientiza hubentud durante carnaval 50 encuanto AIDS titula "Abo ta pensa?" ta un bon ehemplo

ORANJESTAD (AAN); En coneccion cu inauguracion di e exposicion di posternan pa conscientiza hubentud durante Carnaval 50 encuanto e malesa AIDS titula "Abo ta pensa?", parlamentario Mervin Ras ta expresa cu e forma di traha aki ta uno efectivo. E forma aki ta ensera cu e hobennan mes a traha ariba nan propio conscientisacion pa cu prevencion di e malesa AIDS, door di diseña diferente posternan.

Parlamentario Mervin Ras ta felicita tanto e hobennan cu a haya un premio como esnan cu a participa pa nan

curashi di expresa nan emocion y nan opinion pa contribui na conscientisacion di nan "peers" of grupo di mesun edad encuanto e malesa mortal cu ta AIDS. Tambe na e famianan, maestronan, guiadornan y organizadornan un palabra di elogio.

Pasobra segun Ras ta rekeri curashi pa sali afor pa papia y/of expresa encuanto AIDS. Esaki door di e prohibicion of taboe cu tin den comunidad pa papia tocante AIDS. Te ainda den nos comunidad ta condena esnan cu ta infecta cu e malesa aki. Esaki ta haci cu e persona

infecta cu ya caba ta sinti su mes malo y cu berguensa, envez di haya ayudo y sosten ta ser rechaza. Hopi biaha door di miedo, personanan no ta tripi di tin contacto cu e persona infecta y su famia, locual no ta corecto. AIDS no ta ser transmiti door di hala rosea, contacto di curpa sin mas of sunchie, sino door di contacto sexual of door di transfusion di sanger of uzo di mesun hangua.

Tambe tin e taboe pa papia tocante sexualidad. Mientras cu hopi hoben ta victima di abuso sexual, di malesanan venerico, AIDS y di embarzo hubenil, te ainda ta dificil den comunidad pa papia tocante sexualidad. Na varios ocasion Ras a haci pregunta na minister pa asina introduci un curriculum cu ta trata sexualidad, droga y auto-estima. Bon noticia ta cu den planes di innovacion di enseñanza tanto basico como secundario tin intencion di duna atencion na auto-estima di e hoben y relacion cu e mundo rond di dje.

Segun Ras pa di berdad

serio ta necesario, pa involvi nos hubentud den actividadnan dirigi ariba nan, skucha opinion di hubentud y haci uzo di creatividad y forza di nos hobennan pa transmiti informacion na otro.

Hecho ta, segun Ras, cu nos tin cu haci algo pa combati y preveni AIDS. Cifranan ta indica cu Caribe ta na di 2 lugar ariba e lista di paisnan mas infecta, esaki despues di Africa. Na Aruba entre 1987-2000 a registra 334 caso y na aña 2002 a registra 19 caso nobo. Aki ta trata personanan hoben bou di 30 aña. E cifranan aki ta indica cu e grupo di esnan infecta dia pa dia ta birando mas hoben, locual ta haci cu mester dirigi campananan di informacion y prevencion ariba grupo di personanan mas hoben.

Na Aruba UN AIDS themegroup conhuntamente cu e seccion di malesanan contagioso di departamento di Salud Publico ta haciendo trabao preventivo. Tambe Womans Club of Aruba ta

prevencion.

Ras ta kere cu siguramente den cooperacion entre instancianan dirigi pa un maneho integral, haciendo uzo di experiencia di esnan contagia y hobennan por logra hopi den e proceso di conscientisacion y prevencion di e malesa AIDS.

Mirando tur e posternan presenta e parlamentario por conclui cu di parti di hobennan nan ta sinti e necesidad di proteccion y informacion encuanto e malesa AIDS, tanto pa nan mes como nan amigo(a) of partner y cu nan ta di opinion cu mester stop AIDS.

Ras ta spera cu manera e tema ta bisa "Abo ta pensa" pa medio di informacion y conscientisacion lo conduci na "Abo ta actua responsabel" pa di es manera aki hobennan por proteha nan mes suficiente pa preveni AIDS.

Pa finalisa Ras ta desea UN AIDS y tur e organizacionnan y voluntarionan involvi exito cu e campaña di informacion